

TORITENY - ALAHADY faha-25 TSOTRA - TAONA D2019



“Tsy mahay manompo an’Andriamanitra sy ny harena ianareo”.

Ry kristianina havana, mbola tohizantsika hatrany amin’izao mandavantaona izao ny fandalinam-pinoana hahatonga antsika ho EOJ manorina Eglizy Tranon’Andriamanitra sy hahatonga antsika mpanorina tokoa. Mbola anatin’ny volam-pahasoavana isika dia ny namangian’I Papa Ray masina antsika, mbola manakoako ao ampontsika ireo teny napetraky ny Papa ka hahatonga antsika ho taranaka mpamafy fanantenana sy fiadanana fa indrindra maro ny zavatra etrehintsika amin’ny fiainantsika ka mahatonga antsika hiraviravy tanana sy ho kivy.

Mahatoky isika fa ireny teny nampitain’ny Ray aman-dRenintsika Papa Fransoa antsika ireny hanentana ny fo amam-panahintsika fa indrindra ny vakiteny amin’izao Alahady faha 25 taona izao dia mampitodika antsika amin’ny fahaizana mampitraotra ny finoana sy ny fiainana andavanandro

ka ho tena EOJ isika amin’ny fiainantsika, ho EOJ MISIONERA MAMENO SINY ENINA MAMAFY FANENTANA SY FIADANANA HAHATONGA NY TENY HO MOFO ARY MOFO HO AINA.

Mananatra antsika Andriamanitra hametraka tsara ny toeran’ny harena amin’ny fiainantsika. Iaina ny fandrosoana fa fandrosoan’ny olona manontolo sy ny

olondrehetra no katsahiana, izany ny fanoharana omen’i Jesoa antsika amin’ny Evanjely,

Vakiteny I : Am. 8, 4-7

Salamo : Sal. 112

Vakiteny II : 1 Tim. 2, 1-8

Evanjely : Lk. 16, 1-13

hahitantsika ny tena anjara toeran'ny harena, ny fomba entantsika hikatsaka ny harena, ny fomba entantsika mampiasa ny harena eo amin'ny fiainana fa indrindra amin'ny maha olona antsoin'Andriamanitra antsika haniry ny tsara sy hifanatsara, hifanao soa, hikatsaka ny soa iombonana hahitana ny tena fivelarana marina. Fivelarana ny maha-olona manontolo sy ny olondrehetra. Tian'I Jesoa asongadina amin'io fanoharana io fa ilaina ny mametraka ny harena hanampy antsika hivelona bebe kokoa ny finoantsika fa tsy ho reboka anatin'ny fakampanahin'ny fitiavankarena ka izy indray no tompoina.

Izany koa no tian'ny Amosy mpaminany hananarana ireo izay mampiasa ny fananany sy ny fahefany ary ny haren'ny hanapotehina sy hanilikiliana ny hafa.

Aoka hoy Amosy ao amin'ny vakiteny voalohany “ *Mihainoa izao, ianareo mihinana ny mahantra, sy mitady hamongotra ny mavomavo amin'ny tany, manao hoe: “Rahoviana no ho tapitra ny voaloham-bolana; mba hahazoantsika mivarotra vary; ary ny sabata mba hamohantsika ny tranombary, ka ny efaha hakelezina; ny sikla hampitomboina; ny mizàna, hatao mandainga, hamitahana. Dia hovidintsika vola ny fadiranovana, ary ny mahantra, noho ny amin'ny kapa iray lomisy, sady hivarotantsika ny vary loha-kororoka?” Efa nianiana tamin'ny reharen'ny Jakôba ny Tompo nanao hoe: “Tsy hohadinoiko mandra-piavin'ny farany, izay rehetra nataon'izy ireo”.*

Andriamanitra manankarena amin'ny famindrampo no Andriamanitsika hoy isika tamin'ny Alahady lasa teo, tsy lany izany famindrampo izany ary io no tian'i Jesoa ambara amintsika mandrakariva. Raha tiantsika ny hivelona ny finoantsika, ataontsika ahoana ny harena, inona no anjaran'ny harena amin'ny fiaianantsika andavanandro? Izany no fampianarana tian'ny tenin'Andriamanitra ampitaina amintsika amin'izao Alahady faha 25 izao.

Ny mahavariana arak'io fanoharana io dia ilay mpanankarena eto tsy misy anarana ka azo lazaina ary azo raisina fa isika rehetra no voalaza eto satria samy manankarena ao anantintsika ao isika na arapanahy, na ara-nofo na ara-batana. Indrisy noho io harena io na ny marimarina kokoa noho ny fitiavantena dia manilikilika ny hafa isika, noho ny fialonana ihany koa ary indrindra ny fieretreretantsika fa rehefa manana vola sy fahefana dia mahefa ny zava-drehetra dia zary manilikilika ny hafa. Ny hafa dia tsy voatery olona fa hatramin'ny zavaboahary ary hitantsika ny vokatr'izany eo amin'ny fiovan'ny toetr'andro. Noho isika mandrora mitsilany amin'ny fitiavankely dia isika ihany no manapotika ny tontolo iainana, ny zavaboahary amin'ny tsy fahaizantsika mampiasa ny harena, amin'ny fidrandrahana tsy andrariny ireo harena na antanety na andranomasina. “Ny harena ny harena raha mamokatra ary mamokatra ho an'ny besinimaro”. Izany no tiany fanoharana io ambara amintsika amin'ny tapany voalohany, isika rehetra dia samy nomen'Andriamanitra harena fa harena ho entina mamokatra ary mamokatra ho an'ny besinimaro fa raha tsy izany dia ho tahaka ilay ao amin'ny fanoharana isika ka rehefa tonga ny fotoana hanadihadian'Andriamanitra antsika mikasika ny harena dia eo isika tsy mahita havalany.

Ny fampianarana faharoa amin'ny fanoharana io dia ilay fifanakalozan-kevitra na adihevitra nataon'ilay mpanankarena tamin'i Abrahama, hitantsika fa misy hafatra lehibe tiana ampitaina amin'io adihevitra io raha mikasika ny fiainan-koavy. Arakaraky ny eritreretantsika ny fiainan-koavy no tsy maintsy hanaovantsika ny fiainantsika, hetrehentsika ny fiainantsika, raha fantantsika fa misy ny fiainan-koavy dia tsy mahagaga raha miomantsika. Raha sanatria variana isika ka manao fa tsy misy dia very amin'ny rendrarendra nefa hitantsika eto “trop tard” rehefa tonga ny fotoana.

Noho izany aoka hiomanintsika ny hoavy araka ny voalazantsika matetika “anio ny hoavy fa tsy rahampitso”.

Nararaotra ny harena teto an-tany ilay mpanankarena izay lazaintsika mety isika ka tsy nieritreritra ny hoavy. Raha tiantsika ho feno fiadanana ny hoavintsika aoka ao anatin’ny fifanajana, fifanasoavana, fahamarinana, fitiavam-bavaka, ao anatin’ny fikatsahana ny soa iombonana, fampanjakana ny rariny syn y hitsiny, ao anatin’ny fihavanana marina ny fiainantsika.

Fampianarana miaianga amin’ny adihevitra izay mifanaraka amin’ny fotopampianarana averintsika matetika amin’ny tanora dia ny hoe “niany ny hoavy fa tsy amaray”. AOKA HO FENOINTSIKA AMIN’IZAO TAONA NY FINOANA IZAO NY SINY HANOMANANTSIKA NY HOAVY.

Ny fampianarana fahatelo dia ilay hafatra napetrak’l Abrahama : Aoka hihaino an’i Moizy sy ny mpaminany izy ireo izany hoe tsy maintsy hatsaraina ny fandraisantsika ny tenin’Andriamanitra, aoka horaisintsika tsara amin’ny fiainantsika ny tenin’Andriamanitra, ho fanilo manazava ny fiainantsika ny tenin’Andriamanitra, aoka ho sakafo mamelona antsika ny tenin’Andriamanitra. Katolika aho ka mandalina ny finoako, ny fandalinam-pinoana dia miainga amin’ny tenin’Andriamanitra, raha latsapaka amintsika ny tenin’Andriamanitra dia miroso amin’ny sakramenta isika ary io no mamelona antsika ka hahaizantsika mampitraotra ny finoana amin’ny fiainana andavandro. Mameno ny siny tokoa isika raha tanterantsika izany

Antintraterin’i Md Paoly ao amin’ny vakiteny faharoa izany voalazantsika izany. Mila mivavaka ho an’ny manampahefana isika mba ho feno fahendrena izy ireo ka hitarika antsika vahoaka amin’ny fampandrosoana marina sy maharitra hahitantsika rehetra ny tena fivelarana, ny fivelarana ny olona manontolo sy ny olondrehetra *“Ny angatahiko voalohany indrindra, dia ny hanaovana fivavahana, fangatahana, fifonana, ary fisaorana ho an’ny olona rehetra, ho an’ny mpanjaka sy ho an’ny manam-pahefana rehetra, mba hiainantsika amim-piadanana sy fandriam-pahalemana, amim-panajana an’Andriamanitra sy fahamaotonana tanteraka. Izany no tsara sy ankasitrahina eo imason’Andriamanitra Mpamonjy antsika, izay tia ny hahavonjy ny olona rehetra, sy ny hahatongavany amin’ny fahalalana ny marina”*

Ireo no toe-panahy efa fantantsika dia ny 5F izay entintsika mamelona ny EOY ka manorina ny ETA hahatonga antsika ho taranaka mpanorina araky ny fampianarana nentin’i Papa Ray masina ka hahatonga antsika ho mpamafy fanantenana sy fiadanana eo amin’ny fiainantsika andavanandro.

Ry Kristiainina havana, alaviro zay voalazan’i Amosa mpaminany amin’ny vakiteny voalohany, aoka isika hiala amin’ny loza dia tsy inona fa ny fitiavambola ka mahatonga ny vola lasa ho Andriamanitra. Io no manapotika ny fiainantsika ankehitriny, tsy apetrantsika amin’ny tena toerana ny vola fa lasa Andriamanitra, izy no tompointsika, izy no lasa manambara ny zay ataontsika ka tsy mahagaga raha voahilikilika ny hafa, rehefa misy ny voahilika dia misy ny herisetra sy ny fanapotehana. Ilaina ny vola sy ny harena fa aoka ho harena hanasoavana ny hafa, vola amankarena hifanasaovantsika fa tsy hifanapotehantsika.

Araky ny fomba fiteny ny soa atao levenam-bola. Aoka hahay hananararaotra izao fiainantsika izao isika hahay hampiasa ny harena eo am-pelantanantsika ka entintsika hanasoavana ny hafa satria niany ny hoavy fa tsy amaray, tsy hanompo ny harena isika fa hanompo an’Andriamanitra.

Raha manompo Andriamanitra isika dia hifanao soa sy hifanatsara ka hitondra antsika amin'ny tena fiadanana izay manomboka ety an-tany. Aoka ny fiainantsika tsy misy hantsana na oviana na oviana ary aoka tsy hisy hantsana eo amin'ny finoana sy ny fiainana andavanandro.

Aoka isika hanao tetezana hiampitana isika fa tsy hanangana rindrina mampisaraka araky ny hafatry ny Papa, aoka ao anatin'ny fifankatiavana no hampijoroantsika ny tetezana, hifanao soa ka mampita antsika amin'ny tena fiainana maha zanak'Andriamanitra antsika.

Ry Jesoa Tompo ô, mazava tokoa ny hafatra amin'izao Alahady faha 25 taona mandavantaona izao, enga anie izahay tsy ho revo ny fitadiavana ety ivelany fotsiny, marina ilaina izany fa aoka ho vonona hitady mandrakariva ny tena fifankatiavana ka hifanao soa sy hikatsaka mandrakariva ny soa iombonana. Enga anie ny fiainanay mba ho fiainana misy an'Andriamanitra tokoa ka misy fifanasoavana anatin'ny fikatsahana mandrakariva ny soa iombonana. Aoka hisokatra ny fonay fa indrindra amin'izao fotoana izay vao avy namangian'ny Papa Ray masina anay izao, enga anie ho fo velona ny fonay fa tsy hoe sanatria ho fo vato ka hahatonga anay hahay hanomana izao taonan'ny misiona izao ka ho iraka tokoa izahay hizara fiadanana, fanantenana eo amin'ny fiainanay andavanandro hahatonga anay ho tena Eglizy Olona Velona manorina Eglizy Tranon'Andriamanitra ka zary taranaka mpanorina izahay, ho fanasina sy fahazavan'ireo manodidina anay. Amen

Mompera Arseveka Mgr Benjamin Ramaroson